

Legalizacion di matrimonio di mesun sexo ta atenta contra e Palabra di Dios

ORANJESTAD (AAN) – Asociacion di Pastornan di Iglesianan Cristian di Aruba, a convoca un conferencia di prensa den cual a hiba palabra e Pastornan Tirso Kolfin, Eusebio Petrona y Norman Brown.

Pastor Tirso Kolfin a habri e conferencia di prensa y a referi na un carta abierto cu Asociacion di Iglesianan Cristian di Aruba a emiti algun dia pasa pa nos comunidad, den cual nan puntonan principal ta legalizacion di matrimonio di mesun sexo y legalizacion di marihuana riba nos isla.

Pastor Kolfin a indica cu esaki ta un proceso cu ta andando den nos comunidad, y como Pastornan di Iglesia Cristian, nan ta considera



masha importante pa den e proceso aki, cu ta un desarojo cu ta afecta fuertemente e norma y balornan di nos comunidad, y muy especificamente di e Fe Cristian, relaciona cu loke Dios ta bisa den Su Palabra, ehersce nan derecho, obligacion moral y spiritual, di duna nan punto di bista segun e Palabra di

Dios conoci den nos pueblo. Pastor Tirso Kolfin a señala cu esaki ta e motibo primordial cu di awor padilanti ora nan sali den e comunidad y den prensa tocante e temanan menciona, nan kier ta enfatico den esaki y presenta nan punto di bista a base di e Palabra di Dios.

El a menciona cu den e carta abierto nan ta papia di otro aspectonan, ademas di esnan menciona, pero cu ta concerni esaki tambe, manera aborto, eutanasia, cu ta sumamente importante mirando e desaroyonan mundial, y nan no ta considera Aruba hopi leu di loke ta sosode na mundo cu lo no bati na porta di nos comunidad.

Nan ta mira pensamiento y filosofianan cu ta bay linea recto contra e boluntad y e Palabra di Dios, y nan no por ni kier sinta keto sin bida nada, of haci algo.

Pastor Kolfin a indica cu naturalmente, loke ta na caminda pa pasa segun e destino cu Dios a deposita den Su Palabra, ta algo cu Iglesia Cristian no ta pretende di cambia pasobra nan ta

conciente cu den tur ocasion Dios ta na control, y Dios ta keda den control, pero nan tin un funcion primordial, sumamente importante, y esey ta cu como pastornan nan ta yama na trece y anuncia Evangelio na tur habitante di Aruba.

Pastor Kolfin a indica cu e desaroyonan cu ta andando e ultimo temponan aki den nos comunidad, ta nada otro cu un momento pa resona mas ainda e importancia pa nos comunidad tene mas na cuenta kico Dios su opinion ta pa nan bida personal.

El a agrega cu Iglesia Cristian ta haya cu e ambiente con esaki ta wordo treci den comunidad, cu ta vispera di eleccion den nos Isla, cu tur persona y grupo ta trece nan pensamiento dilanti, ta mas cu claro e Iglesia Cristian kier muera riba e violacionnan di leyman di moralidad y contra Dios su opinion y punto di bista.

Den e tempo cu ta bay bin, Iglesia Cristian lo presenta articulonnan y debidamente lo informa pueblo atravez di programanan na radio y

television y di articulonnan den corant, pasobra e decadencia di e situacion cu a presenta su mes na mundo, y aworaki tambe na Aruba, ta un decadencia no kizas for di punto di bista di e ciudadanonan en general, pero si den e punto di bista Biblico y spiritual.

Pesey e Asociacion di Iglesianan Cristian tin e motivacion y e deber di laga sa tur hende na Aruba cu Dios ta contra e pica y estilo di bida funda y basa riba homosexualidad. Pastor Tirso Kolfin kier a laga bon cla cu Dios no tin nada contra e persona cu ta practicando e pica of e actonan aki, pasobra Dios ta stima tur hende, y pesey E ta ofrece e salimento, conforme su boluntad, for di e bida aki. Pesey nan no ta considera e punto di bista di Dios desacreditando e leyman aki contra e moralidad divino, como atake riba ningun hende, pero mas bien e ta pa spierta, encurasha, anima tur, pa no viola Dios Su Palabra, pero atene nos mes na loke Dios Tata kier di nos.